
№ 29 (1280) Уйт дор тыдащ 19 хатд 2025 тад



Хон мув Федерация сельской хозяйство Министерство эвадт партапсы нэпек этас «Хоты па мала хатдатна муң пандуна худ ведта ант рахал». Дунан ар пелак пан лап тохардайт. Худ нох мантал порайна есалата век ант рахал.

Дуң порайна худ ведта ант рахты панат:

– Уйт дор тылащ 1-мет хатд эвадт щёхар тыдащ 30-мет хатд маса - Войкарской, Дорвош, Ханты-Питлярской ларат па

– Уйт дор тыдащ 15-мет хатл эвалт щёхар тылащ 30-мет хатд маса – Дорвош посд хуват тадаңты па Ай Ас хуват Кев Ас посл эвалт Кантерпосл маса.

Путы худ эвадт ведта рахты худат кутна: емаң худ, ловның, лещ, плотва, най худ, хансан худ, елец (мегдыма), дэвасы ведпасна ведта па ант рахлат, топ под сопна, рюжи, фитиль па вентерьна. Хансаң хул под сопна, сайпна, рюжина, фитильна па вентерьна. Паннин пыжьян) - напатты понна.

Унт дор тыдащ 1-мет хатд эвадт ёхан патты едпийн -Щаня, Войкар па Танью ёханатна, тамащ худат ведта рахал: емаң худ, ловның, лещ, дар, плотва, най худ, хансаң худ, елец па паннин.

Унт дор тыдащ 25-мет хатд эвадт Ас потты тыдащ 5-мет хатд маса - Таз Худосее ёхан посдна унт дор тыдащ 10-мет хатд эвадт унт дор тыдащ 31мет хатд маса Таз ёхан эвадт Яунтарка посд маса па ТибейСале ёхан эвадт Худосей ёхан маса сайпита ант рахал.

Унт дор тыдащ 26-мет хатд эвадт щёхар тыдащ 15-мет хатд маса - Таз ёхан послат эвалт Худосей ёхан лоңты тахайна Красноселькупской район Толька похал маса ищи сайпита ант рахал.

> Вера Лонгортова хансам потар

#### Уталтыты порая дэщатыман

Хащам тадатан вошатан, хонна па ай куртатан кев элты садикат па ашкулайт омасты питсайт. Дыпидад иса туңа-щира верман уддайт.

Ант мосал катра иты оляпан па нови муван хот питардад нёсытты. Щишан, хонна тыдащ модтас няврэмат утадтыты унты, уталтыты хотат иса етшаман омасдат, куш хадэват щий дона.

Кев сыд районан удты ашкудайт Лаборовой па Зелёный Ярна вантсайт. Классат, муй хорпи мосты пормасан тэкоптаман уддат. Нови тут картэт, йиңк щёрыты тахайдад иса ямат. Унт дор тыдащ соханты унты аратал ашкула вантла, ищиты няврэмат уталтыты кеша рахты ёшпосаң нэпек кущая мада.

Аллина Тоярова ханшам потар



.: 257: 257: 25 



### Ямал мувна «Земский тренер» программа пунсда

Ямал мувна физической культура па спорт хоща ропытта йиты нэңхэт хущты ораңна йидап нятапсы этас. Ропытта эттэл порайна йи миллион солкувайна мата питлайт. Итта щимащ мера тренерпреподователят ораңна мата питда, щиты олман холна мета маса ропата щи лоңта веритал.

«Земский тренер» программа 2025-мет тална Хон мув Президент Владимир Путин пунста партас. Щит, ай васатна, хата 50-кем щёрс нэнху ол, нэнхэт вуд васат эвадт ропытта ат йидат. Ямал мувна па, губернатор Дмитрий Артюхов щи программа холна па вудамтта партсадды, ай похлат па щита ат лондат.

«Ямал мувна «Земский тренер» программа пунста дэщатылу. Мун лувел вуламлэв: анта топ ай похлатна ропытты нэңхэт вахлу, вуд васатна па – щит Новый Уренгой па Но-



ябрьск. Муң региону хуват сэңк ар ям касты хар пунсда – касң васна па похална «Северный характер» касты харат этдат. Пулнавтна мет вуд спорткомплекс «Ямал-Арена» верда. Новый Уренгой па Ноябрьск васнанна «Факел» нэмпи харат пунста дэщатыдат. Пунсантэд юпина, щита ропытты нэңхэт сэңк маста питдат. Ма номастэмна, там программа онтасна, муң хощев ар номсаң нэңху ропытта ёхатд», - Ямал губернатор Дмитрий Артюхов лавас.

Щимащ нятапсы ясна пайтты ораңна конкурсный отбор манта маста питд, мет алаңна собеседование, щи юпина ропытам талдал вантлайт, хата онттыйс, спортивной рязряд, ишакты нэпекат па знак отличия ат тайд.

Конкурсной отбор унт дор тылащ 1-мет хатл эвалт щи пинтщал, щит пущщи Ямал мув физической культура па спорт сайт хоща вантта рахал па дырамтта.

Ямал мувна ропытта ёхатты нэңху, партам организацияйт эвадт дувед рахты таха пирыта веритал па яха ропытты нэпек ханста.

> Вера Лонгортова хансам потар

#### Вантопсая яңхаты



Хабэча Хываревич няврэмдад: Ясавэй, Ольга, Илне, Эдуард.

Унт дор тыдащ 15-мет хатадан Канащ Пухадан «Овс муван хошмадтам» нэмаң хораң вантопса пуншса. Хабэча Яунгад нэм антом туп Ямал доватан яма уйтса па уйтда, аратад мув доватан нэмад щащас па щащты питал. Инты унты ки ус, 75-тадад дудан постас.

Там хораң вантопса тадаң тыдащ манты питал, кашң хоят щита кащалал, хоты нюраман хоятат уддат. Яна-ей уддат! Хор вуты кеша нэман хорамаң сох ёрн хирдал эдты ант таддысат. Щит щи шеңк тынаң!

Хабэча Хываревич «Няръяна Нгэрм» газетайн кущая удмад порайн, потартысды, хоты сахат туңа-щира хор вуты мосад. Патлам тад юпийн шеңк ям хорат ай кер тылащан яма тыйлат. Дув ястылыйм ясаңдал нумдалдув, ант ёрэмаддув.

Хоты ясаң вуйлыйм хоятат ястылысат, там йисан аратал мир кутан тамащ водаң хоят ант уйтты, хой дудан веры-

> тас кашң хоят пидан потрэмиты, кашң хоята каш ус Фёдор Константинович пидан уйтантыты.

Хольмаңкем модтас тал сайн дув хонна Нельмовой ноптадты пана янхилыйс, ши пан Горка вош пуңадан уд. Ма ащем Кирилл Семёнович Тояров хора ноптадты панан вуйдысды. Щи ураңан щи хорат муң хощаев

уддат. Хабэча Хываревич онтасан кашң семейной архив тэкнас...

> Аллина Тоярова ханшам потар

#### Дапат сыс кат пуш яңхты рахад

Унт дор тыдащ 9-мет хатд вуш эдты «Руслайн» авиакомпания Пулнават вош эдты Емвоша хоятат дапат сыс кат пуш тутдыты питдадды. Дапат худметан па хутметан. Манты юш 1 щёс 5 минут.

Там тадан ай кер тыдащан мет одаң тохданхоп там вошнан кутан янхты питас. Щишан шеңк кена йис, ант мосад па вошат мохты манты. Билет https://www.rusline.aero/ официальной сайтан дутаты, мойдантыты янхаты.

#### Унтан хурыманшак яңхаты

Хащам ятан кашң курт па вош эдты айкед ёхатад, тата-тута апщие вантыса, хоятат хоща этлыйс. Еша улты мурах па толах акатман янхты питдув, щишан хурыманшак янхаты.

Каматса хоятан, мет ямшак ки – аршак хоят патан вохаты. Унтан таканшак потартаты. Порыдытан юпийн дэтот шукдан ход патан вуядан, унтан ад хаядан. Щера юх иса щепан таядан. Кушкепа тут вущитыдты, апщиян падтаптыдты.

Аллина Тоярова ханшам потарнан

## AHTANGGRIR MAG

# Хорам хот ов харат пирыдайт



Уйт дор тыдащ нядхощъянмет хатд эдты Дорвош районан «Сама мосты хотвод харэм» касапса пуншса. Касапсая пидтащты уранан, унт дор тыдащ дапатхощъянмет хатд унты куртан утхота муй па Мужи вошан удты ЖКК департамента заявка нэпек маты мосад.

Хот ов харат вантты па пирыты юпийн, мет сыстам па хорамана дэщатам хотводан удты хоттэд мохет сот щёрас содкувайн мойдаптадайт. Кимет, худмет, нядмет па ветмет тахаята этам ов харат уранан хус щёрас содкува мада.

Районэван там касапса нядмет пуш верда. Едпи тадатан Мужи вошан удты Липатниковы хоттэд, Ямкурт эдты — Куртямовы па Астраханцевы — Горка вошаң мохет одаң тахая этдысат.

Касапса эдты модты инщасапса тайдаты ки, там сайтан: clck. ru/3N6pxx рущ ясаңан дуңтаты.

Зоя Куртямова ханшам потар

### Айдат ёх кеша ядап хар

Губернатор нэмпи грант ох шитты ураңан кашң тад касапса верыдыда. Хоятата ям вер туты щиран номпсаң, каркам хоятат арсыр проектат дэщатдат па щи касапсая нэпекдад китдат. Китам рупатайт кутан мет ям онтас туты проектат грант охан эсаддайт.

Там тал касапсая китам рупатайт кутан, Овкуртаң айдат ёх актащты хар дэщатты вер пирыса па губернатор грант охан маса. Щитадан, ванта, нэпека ханшам вер туңа-щира тыйд.

Айдат ёх актащты хар пуншты ураңан, атэд хот омасты ант мосмитад. Щи кеша ашкудайн удты каматса хот ят мосты щира верда. 112 квадратной метрайн ёнтты па потрэматы харңан, щита кущая удты рупитты хот ят па ёхи доңтыйн сох тахартты места дэщатда. Ядап пасанатан, удасатан, норматан па па хорпи мосты пормасатан тэкаптада.



«Дорвош районан энамты няврэмата вер сахат актащтыя, тами кимет хар. Мет одна Мужи вошан тамащ хар дэщатса. Айдат ёх пидан уйтантытэман, манэм ныда, муй хорпет там йисан номпсан няврэмат. Муй иса даңхадайт верты, хува манты номпсат тайдат, сэмдад ад волидат.

Щи кеша муң шеңк ун рупата вердув, дувидад худантдув, иса нётдалдув. Ма нумастэман, Овкуртан удты айдат ёх тамащ мойдапсая шеңк аматдат», — Дорвош район куща ху Олег Попов ястас.

Зоя Куртямова ханшам потар

#### Касты па юращты хот пуншда

Ямал губернатор партапса хуват округеван, кашң вошн «Северный характер» юращты хотат омасдайт. Там пуш ходна Тарко-Сале, Губкинской, Ноябрьск, Новый Уренгой вошатан щимащ хотат вердайт.

Мужи вошан «Северный характер» касты па юращты хот па верда. Щит эдты правительство сайт хоща айкед этас. Юращты хот омасты кеша округ бюджет эдты ох эсадса.

«Ядпа верты хотэд нийдсот квадратной метра доватадан питад. Хот дыпийн бокс, рукопашной бой, единоборства, гимнастика па тренажёрной залат дэщатдайт.

Там хатд кеша хот омасты харан хотводад



карты эдты акатса па хот патэд вуса. Тадаң тэдан там пуш етшаты верэд уд», — хот верат туты департаментан ястаса.

Зоя Куртямова ханшам потар

#### объявление



#### Пирасты порая дэщатыман

Щёхар тыдащ 12-14 мет хатдатан аратад мир пирасты хара сонтамад, муй хорпи верат ин щи урадан вердайт, щит эдты ЯНАО избирательной комиссия куща Андрей Гиберт ясан верас.

ЯНАО Законодательной собранияя – 22 хоят пирыда, вошаң-куртаң думаята – 123. Ин там хатдатан 442 хоят нэпек мас. Щишан, ойң хоятат ям тахая питты туп верытдат.

Ин пирасты дэщатыты верат иса мосты щиран мандат, нэпек мийм хоятат иса ар пелак щиран вантдайт. Мата партияйт па ад хоятат ураңан пос пондув, щи нэмат унт дор тыдащ 8-мет хатадан уйтты питдаддув.

Унт дор тыдащ 15-мет хатд вуш эдты щёхар тыдащ 10-мет хатд унты кашн вошан па куртан избирком хоща рупитты хоятат хотат хуват яңхты питдат. Щутщаты хатдатан 10.00 щёс эдты 14.00 щёс унты, па рупитты хатдатан 17.00 щёс эдты 20.00 щёс унты. Щи тумпийн рупата харат хуват па яңхдат, аратад мира потардат, хой пирыда, па ходта пирыда.

Щимащ хоятат эдты падты ант мосад, дув нэман думаттам сохан, хиран мадайт. Кашң хоят нэм нэпек тайты питад. Щишан, овдан пуншидыяты, ад паддыяты!

Аллина Тоярова ханшам потар



# Ева Шмидт ханшам киникайт эдты уйтантопса





Ева Шмидт шуңат хор.

Мет одаңан ияха актащам вошаң хоятат едпийн Научно-библиотечной хотн краеведение тахайн рупитты куща нэ Алла Иштимирова-Посохова ям вуща ясаң мир едпийн тус па потартас, хоты тамащ «Обычаи» нэмпи мирхотат па уйтантопсайт дапаткем тад сыс вердат, дудан хантэт муй венграт духсана па япсыена дый кутэдн кашң порайн усат. Щимащ водаң вер ураңан вошң хоятат библиотека хотн ияха актащидат, ханты культура, рут ясаң, наука па литература верат эдты иса тата сыр-сыр айкедат дэщатдат. Щиңанща анта туп дый

водаң учёной ёхат-нэңат эдты ищиты арсыр айкед тутыя верытдат. Ванты, мун щи па хон пелак хоятат пидан катра порайт эдты па иса ёхи хащам хатдат унты рут мира дуңтасдув.

мирэд эдты потардат, Венгрия хон пелак

Щадта па Будапешт вош Центр языкознания таха эдты ёхтам, щита научной сотрудника рупитты ханты ху Виталий Сигильетов мирхота ёхтам хоятат едпийн ищи хорасаң айкедат верас. Мосад ястатыя, хоты там хатнэху яртъянкем тал сыс Венгрия хон пелакн уд па наука щирн рупитал. Виталий Сигильетов щиты потартас, хоты там «Ева Шмидт киникаяң» вантопсайн анта туп дув наука щирн ханшам нэпекдад уддат. Тата, щи вер тумпийн, ханты па венгр мирнан хорамана па туса дэщатам киникайт ищиты ияха акатсайт, дудан хоятатн ин оша ат версайт па кашң пуш рущ ясаңан туңа-щира дуңатсайт. Виталий Сигильетов яснат щирн, Венгрия хон пелакн Ева Шмидт ханшам нэпекат дув сорма питмал юпийн арсыр хоятатн эсадтыя питсайт.

Мосад ястаты, хоты 2005-мет тадн «Отчёты из Сибири», 2006-мет тадн «Язык, диалект, письменность,

Там мосванан Ёмвош Научнобиблиотечной центр хотн Венгрия хон пелак учёной нэ Ева Шмидт шуңат ханшам сырсыр киникайт эдты вантопса дэщатса. Щи мирхот верты ураңан там кутатн кат венгр па йи ханты хоят па хон пелак мув эдты ёхтыдысат. Дый Ева Шмидт шуңат катра порайн туса ханшам арсыр наука щирн манты нэпекат Югра мувева тусат па там библиотека хотэда мойдасат.

№ 29 (1280) Уйт дор тыдащ 19 хатд 2025 тад



В.А. Сигильетов киникайт дуңатты хотн айкед туты порайн.

«Ева Шмидт ханшам киникайт библиотека».



Будапешт вош эдты ёхтыдыйм Венгр мир хоятцан.

Ева Шмидт ханшам нэпекат электронной архива Венгрия мувн туса версайт.

литература», юхат этсат: «Грамматика шеркальского диалекта», «Анна Лыско-

ва арат» па «Учение об обско-угорском

**SCHMIDT ÉVA** 

**Архив Евы Ш**мидт

Архив

Опубликованные

материалы

фольклоре».

Мирхот сохнаптаты кемн Виталий Сигильетов нюхмас: «Ева Шмидт шуңат удапсайд хуватн шеңк ар сыр-сыр айкед ханты хоятат эдты ияха актас муй туса дэщатас. Ин дув киникайдад хуватн куш хантэт, куш венграт муй па па мир ёхат-нэңат ханты мирэв хорамаң ясаң, литература па мет шопаң арсыр монщат па йис арат ошаңа-щащаңа вердат».

Щимащ уйтантопса там кутн ус.

Владимир Енов ханшам потар

нэма потартсат: «Наң дудан

ашкуда етшаптаты юпийн

филологической факульте-

## Умащ дуңтарат ханшты нэ

(Одаң шупад № 28 (1279) дуңтадн)

Ванты, айтэдн вантсам, хоты ма опращем ики частушка арат хорамана ханшас па юхат гармонь нарасъюх щиратн ёнтас па арсыр вошан мир едпийн щитат туса арыйс. Мун, эрзя мир хоятат, па мордва мокша нэм ёх эдты ищи па еша па хорасн уддув. Ясандув тухад порайн па щирн мандат, думатты сохдув па веншдув ищи па хораспет. Муй арат мордва мир хатнэху мун мувевн тайдув, ма туна-щира ин ходна ястатыя ант па верытдам. Туп катра миллион араткем, адпа, ищиты ус. Дый кутэдн эрзя мир, ма нумастэмн, еша аршак тамхатд уд.

– Ин наң ищиты «Чилисема» журнал хоща ответственной секретарь нэ щира едды уддан па рупитдан?

— Па ищи тахаемн щи уддам па рупитдам. Муң журнал нәпекев анта туп мет ай няврэматан самаңа дуңатман тайда. Унашак ювам хоятатан дув ищиты там хатдатн яма дуңатда. Муң щи нәпекан арсыр хорамаң айкедат туса ханшдув.

Щи вер ураңан, почта хуватн журналэв кашң талн япсыена ар хоятатн иса хандштада. Кушкепа муң рупатаев ад щиты туром ураңан ант манал, ванты, ищипа рут мирэв ураңан вещката тамхатл рупитлув.

– Муйсыр верат эдты удапса щирэнан наң дуңтарданан кашң пуш ханшлан?

— Ма нумастэман, щит шеңк хув потар. Хун ма кутап ашкудаемн утадтысам, ма тадаң худам пуш Мордовия мувев писателят Союз таха хоща удты ёхатн па нэңатн Саранск воша вохидысайм. Щи порайн литературной вантопсайт муй уйтантопсайт ай ёхдув ураңан нэман утадтатыя щира версайт. Щиңанща Саранск вош па щита удты хоятат манэма шеңк умща йисат. Сыр-сыр тахайн вош хоща усам, дуңтарат дуңатсам, потарсам поэтата муй писателята, хоты щитат ханшсам. Хун ёхды манты питсам, нэпек ханшты хоятат щиты ма-

Юхат ма щий уталтытыя манты номас щи версам, самана рут муй рущ ясанан иса щи япсыена уталтысам.

– Татьяна Петровна, наң туп ясаң тайты щират эдты тата потарсан, муйсыр верат эдты наң дуңтардан хоща кашң порайн ханшдан?

— Ма хоятат дый кутэдн яма удтыходты верат, мув-ават давадты, аңки-ащи, няврэмат эдты стихат ханшдам. Ин тата дуңатдэм мет ай няврэмат торапты потар. Там от эрзя ясаң эдты манэма поэтесса нэ Марина Зарубина рущ ясңа толмащтасды па дув «От сияния Ковавы» нэм тайд:

От сияния Ковавы
Ночь светлее стала.
Лёг в объятьях Масторавы
Шар земной устало.
На коленях материнских
Обо всём забудет,
Ни печалей исполинских,
Ни тревог не будет

…Ковава — щит, ванты, тыдащ дуңх, Масторава рут мувиев шавиты дуңх ими.

Щалта щимащ дуңтар эрзя мир нэ элты ханшсам. Ма дувед «Эрзянка» нэмн юкантсэм, ин худанта-сары:

Словно летний румяный восход, Мир украсив собой спозаранку, По селу величаво идёт Солнца красного краше эрзянка. Белоснежного платья простор Вышит мудростью верно народа.

Вызывает искристый восторг Рукотворное чудо природы ...

– Муй арат киника наң удтыходты хуватэнан аратэдн ханшсан па эсадсан?

- Кат нэпекем эдты ма мет одаңан наңена щи потартсам, худмет «Оймамо старка» («Пристанище») па нядмет «Кудов ки» («Дорога домой») па там ёхи хащам 2025-мет тадэмн «Колыбельную спою» ветмет киникаем ищи эсадсэм.

Ма ар тахаята яңхтэм пораятн сыр-сыр нопсатн ёхатдайм па щи вер ураңан арсыр хораман стихат ищи курамн тыйдат.


– Муй наң Югра мув округев, Ёмвошев эдты муңева ин ястатыя верытдан? Тамащ Россия мувев финно-угорской писателят уйтантопсайт, наң щирэнан, мосдат муй анта, муйсыр онтас дый наңена кашң пуш тудат?

– Ма щирэмн, финно-угорской мув писателят уйтантопсайт кашң киникайт ханшты хоятата шеңк мосдат. Муң арсыр мират пидан тата уйтантылув па потрэмилув, муң кутэван едды сыр-сыр нэпекат ханшты щират эдты яма нопсат едды удты-ходты хорасэвн тудув.

Ёхи хащам кутатн щиты рахд ястаты, хоты Татьяна Мокшанова - щит, ванты, дув псевдоним нэмад, опращ нэмд щирн дув Швецова нэм тайд. Там поэтесса Мордовия Республика кущайн 2006-мет тадн литература щиратн мойдапсайн юкантса, кат пуш Россия хон пелак мув Союз писателят тахаев эдты 2019-мет па 2024-мет таднанан Почётной грамота нэпекнанан мийдыдыса, «За вклад в развитие финноугорской литературы» Почётной нэмн маса па мевал посан катлаптаса. Юхат, ай тахайт потты тыдащн 2021-мет тадн, дув па Мордовия Республикайн «Россия мув Союз писателей» таха куща нэңа пирыса. Щимащ ошаң-щащаң хоятат финно-угорской мират хоща тамхатд уддат, рупитдат па хатнэху удапса хорамана па туна-щира едды дэщатдат.



Владимир Енов ханшам потар



Муң мувув сәңк тащаң тус ясаң нәңхәтна. Мала хорпи омащ пормасат вердат, йинтасдат. Щи кутна па анта топ ясна ропытты, номасна ропытты нэңху па ар - йис потрат, манщат, дуңтарат хансдат. Дув кутдадна Евдокия Езиковна Серасхова, Приуральской район Зелёный Яр похална ар нявреман хаттэдна сэмна питас.

Евдокия Езиковна дуңтарат хансал, ар пелак ханты ясаңна. Потар соплал, йис потардал па дуңтардал ар пус «Приуралье» районной газетая поныдысайт, «Красный Север» окружной газетая, «Ямальский меридиан» па «Северяне» журналцанна ищи этдысат. Дув хансты дуңтардад ашкодайтна няврематна онттадайт. Хансам ардад Охсар похал «Овс мув нэ» фольклорной ансамбль нынатна аридайт.

Там лопасна Евдокия Серасхова хансам дуңтарат понду, дуңтаты па омащдыяты.

#### Энмам мув латыем

Сэмна питам мувам, Тата вуллы йисам. Сарпайдан па ёсдан Онттаман таяддам. Хата, ёхан, сайм Щуриял ма ощлам. Хата ар рэх энмад, Талах артан этал, Ай тэдна ма номдэм, Касң мув щоңиен. Хорам, тащаң мувам, Энмам мув латыем, Холкепа ант мандам, Самамна ма тайдэм.

#### Ясңан хасы

Ёхан дыдад-саям, Касң мур дыд-ясңад. Юх лэр эватда ки, Юх мохты нох сард. Ханты, яснан хасы! Ясңан юх дэр иты, Йис олапсы пилна, Яха ёхтапталлы. Васна кепа оллан. Элсахан ант тайлэн, Яснанна аридан, Йис олапсы номлэн. Ханты, ясңан хасы! Яснан тайи, номы, Яснан ад ёрэми Онтты, алңищ туви.

#### Телёк

Ма лохсыем, Путы тут хульмии. Щалитман Телёки Дувед лаваддэм.

Куриедад осаят Сохалт юх хорпет. Йидап энмам юх иты, Аңтыет то ныдаят.

Нын идампа мастасдан, Хой ма лохсыем? Ма лохсыем Телёк, Ай кадаңии. Ёхан сыдна мандаман, Пам дыд, Щидта яндаман.

Лыпатна па нятайна, Ант сокдаман акатдэм. Авкаям, худ хасэңна, Адаң сохат йинщталэм.

Яспат эвадт путы нянь, Омщаламан дыл. Манэм хоты морах ям, Дувед путы нянь.

Ма антам ки авкаям. Ваханман яңхал. Ма таклэм ант веритал, Ма па дув такдэд.

Ма авкаям Телёк, Путы тут хульмии. Ма авкаям Телёк, Ма сам дохсыем.

#### Сумат

Сумат эви хорасна Ор дыпина вордад. Нави пахлаң сахна Торамна дув соматтам.

Па порайна, па охсамна Торамна дув майдада. Сарнең - вурты рат охсам Сусн сумат таяд.

Тадды йид па ясна сэвам, Нави-путы щал панад. Товы най хасамтына, Ай лыптаң, ай охсам,

Хорасан ның сумат, Сапал вулты йирал. Восты расэң, лещ камка, Дун порайна лапкал. Йис ронтдал нох тахартал, Тынаң эви хорпи.



#### Ханты ның эвие

Эвтам сахаң, эвтам ваяң, Ханты ның эвие, Мур кутна карияд. Кортэң ернасаң

Па кортэң охсамаң. Ханты ның эвие, Мур кутна волияд.

Вес хощнат вуртэт, Пеңкат ад вордадат, Путы сэм хульмаң, Охсамдад хуват.

Ясдал веранат, Курдад каркамат. Ханты ның эвие Мур кутна этлияд.

Касдыта веритад, Худ ведта веритад. Рущщи ки лаяд, Рущщи па веритал.

Ханты мур кутна, Щимащ эвиет, Осат па оллат, Па олта питлат.



## Йинтасты дуй

Кат ор хат лайс. Йи ор хатдна нявремат оллат, кимет ор хатдна нявремат оллат. Йи ор хатдна нявремат мули сытамат, том сый антам, там сый антам. Кимет ор хатдна па холам йик ос. Вуд йикад нэмад Йинтасты дуй. Кат йикад холна атсамцан. Кутэдна увдат, няхлат, аратантылат па кутармалат. Амэд ащед педа лавад:

– Щи там нявремдан тарассы йисат, орна туддаман ки лолан ям?! Нэңхэт нявремдад йина сытаман оллат!

Ида педайи йис, дысат, сай таңха енщсат. Амэдна ид хойта парсайт. Лавад:

– Ид хояты, халэват адаң кидду, мин ащен пидна юх сэварта мандаман, нын па щита ентлаты.

Кат атсам нявремнидад сара воямсайнан, Йинтасты дуй па холантал.

Амэд лавад:

– Алаңсахат нох килдаман па нявремдаман орна туддаман, щиты лавдаман, мин юх сэвартэман эвадт, нын тата ентаты, отча па сара юхы хондаман.

Алаңсахатты йис, сай енщсат, соматлисат. Топ Йинтасты дуй аса холсалды, ходы амэд лавас. Сытаман щепад дыпина нянь сукиет понас. Мантсат. Ащел па амэл алнищ сосланан, дын юпанна кат ай йикан. Мет ялта Йинтасты дуй сосд, нянь сукиет явалад. Амэд Йинтасты дуй педа лавад:


- Йина адтайи сосдан, еса такансак состэн?

Хув соссат, ван соссат, орна ёхатсат. Амэд лавад:

- Нын тата ентаты, мин том ор педа янхламан, щита ям юх сэварты таха ол. Мин етсадман па йидман.

Нявремат хыщсат, амасдат. Амэд па ащед пидна топ ор сайна пентсанан, ёхащ вусн лайс.

Щи амасдат, патдата питас,



- Хойна юхы тудаю, вантатн, хатду патдата питас. Холна нави пущщи манду, ювам ёсу дап ант тувам пущщи.

Йинтасты дуй алңищ сосд, нянь сукат вантыяд. Топ нянь



сукдад щищкетна мули юхы дывамат. Щиты тапатлимансорман, патламан, вурайна хатэл хоща этсат. Ув пунсмед антам, холантдат, амэд ащед пидна щи халдатан щатд:

- Малай нявремдаман орна ласкасдаман, том хатна йина ям, нявремдал енттэл щатл, хат дыпед сыяң. Мин па тад хатна амасдаман.

Щи курамна ув пелак щи питас, иттам Йинтасты дуй юхы ракнас, катңидад юпедна.


– Малай, – лавад, – халдадтан, мунев орна тусдан, итта па халдап.

Па щиты оллат, айсак йикнидан па увданан, кутармаднан. Йи ув-хэран сыян. Па щи амэд дынан лавта питас:

– Мала педа щиты увдатан? Том хатна йина нявремиет сытаман ентлат, нын па хат нох адамдаддан.

Па щи нявремдан орна туты номасна ёхатсайнан. Нявремдан ил хоядсалдан. Ай атңидал мохты щи воямсайнан, топ Йинтасты дуй ант хойд, холантад. Амэд лавтад щатд ийикед

– Алаңсахат лавдаман, па орна юх сэварта манду, вуддаман па



Алаңсахат нох кидсат, сай енщта амассат, амэд лавад:

– Итта мин ащен пилна па юх сэварта мандаман, нын па юваты, щита ентлаты.

Йинтасты дуй лавад:

- Ходы ентлу, нын па саха мунев орна ласкаддан.

Амэд лавад:

– Антам о, малай итта ходы нынан орна ласкаддаман. Ходы олдыт олмад. Малай щиты рувемадан?


Ким этсат, Йинтасты дуй щеплал кев пулатна тэл понтсалды, состал порайна ёс эдты явалтал ораңна. Орна ёхатсат, па щиты хыйсайт. Итта ходы мет па хувви тусайт. Хув амассат, ван амассат хатдэд па щи патдата питас. Мантсат. Щи соссат, щи соссат. Щамды тэдна питсат, патдам кутна нэмоса кев ант ныда, хата сыядалдал, хата щиты сосдат. Щиты тапатлиман-сорман хатэд хоща воллы-па этсат. Каман лайдат, холантдат, па щи амэд ими ащел ики пилна йи ув сыян, халдаднан:

- Малай таңха нявремдаман орна тусдаман, том хатна нявремиет ентлат, амыңидад, ащинидал эдты кас, мин па итта отща амса. Итта ходы щи хуват тахайна тусдаман па парта ёхаттэд антам. Щиты халдатан эвадт, ув пелак ракнас. Итта Йинтасты дуй апщинидал пидна юхы ракансат. Йинтасты дуй лавад:
- Малай увдатан, малай халдалтан? Мунты лавсатан муңилу па орна ант хыйдаддан?

Щи щикинча, щиты олматсат, нявремдан па орна тотлиман антам. Щи.

> Нина Климова (Зелёный Яр) лавадтам манщ

> > Вера Лонгортова дэщатсадды





## Емаң хатл постылысув, ям номасан лакки маныдысув

№ 29 (1280) Уйт дор тыдащ 19 хатд 2025 тад



Там хатдатан округ доватан сот предприятий рупитад. Хой уншак тахаятан, хой па община щиран. Кат щёрас худ ведпасдаты хоят, дув кутэдан ар пелак шоши мир хоятдув. Кашң тал яң щёрас модтас тонна худ мийдыдат. Щи веран худ эдты верты дэвпасат округ доватан мандат, па щи тумпийн, хон мувев

доватан дутдайт.

Дунан мет артан пландад тэкаптадат. Кашң хатд ходапдал вантдат. Туп ищипа кушкепа кум шитсат емаң хатда ёхтыдыты, мойдантыты, рутдад-сырдад пидан уйтантыты. Кашң вошан, куртан, ноптадты панан турамсот каш, ёнтопса харат верыдысайт. Хоятат уранан худ кавартыса, шарытыса. Нэмодты хоят хошъйиңкды ёхи ант манас. Няврэмат па ун хоятат ураңан мастер-классат верыдысайт. Худ сох, щашкан эдты пормасат, ёнттотат ёнтыдысат. Нэпек эдты хорамат аймтысат, сак лопсат картылысат.

Там лопасан вантаты, хоты сахат тадаң тэдан емаң хатд маныдыйс. Мосаң матты уятты хоятан кащададдан. Худ ведпасдаты ёхдув пландад ат тэкаптадат, аршак педнайды хатд, Ас йиңкан тэваң, щеп охан тэдаң!

Аллина Тоярова ханшам потар





#### Газета «ДУХ АВТ»

Адрес редакции: 629003, ЯНАО, г.Салехард, мкр. Богдана Кнунянца. д.1, каб.106 (34922) 4-68-63

E-mail: luh.avt@yamal-media.ru

#### Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)

#### Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558

%:XEX:XEX:XEX:XEX:XEX:XEX:XEX:XEX:

#### Тираж 1300 Заказ 0980 Подписные индексы:

ПА700, на полугодие - ПР561 № 29 (1280)

Газета вышла в свет **19 июля 2025г.** Подписано в печать **17 июля 2025г.** по графику: 16.00 фактически: 16.00 Газета выходит по субботам

Цена годовой подписки 88 руб., в розницу не распространяется

#### Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ. г. Салехард, мкр. Богдана Кнунянца, д.1, каб.106

Фактический адрес: 629007, Ямало-Ненецкий автономный округ, г. Салехард, ул. Чубынина, д.39A

Генеральный директор AHO «Ямал-Медиа» Зулинова Марья Андреевна

Главный редактор Яковлева Аллина Кирилловна